



Vischnaunca Tujetsch
Gemeinde Tujetsch

Protocol dalla radunonza da vischnaunca

dils 10 da fenadur 2020

allas 20.00 uras ella halla da gimnastica dalla Scola Sedrun

Protocol dalla radunonza da vischnaunca dils 10 da fenadur 2020 allas 20.00 uras entochen allas 21.15 uras, ella halla da gymnastica dalla Scola Sedrun

Presidi: Martin Cavegn (president communal)

Actuar: Simon Collenberg

Dumbravuschs: Otto Curschellas e Sabrina Flepp

Presents: 23 persunas (inclus suprastonza ed actuar)

Perstgisas: Daniel Schmid, genau
Mario Hitz, vischin da Sedrun
Tumaisch Valier, vischin da Camischolas

Tractandas

1. Avertura
2. Residenza Dulezi – Finanziaziun dil secund plaun sutterran ed adattaziun dil dretg da baghegiar
3. Orientaziuns
4. Varia

1. Tractanda Avertura / Beinvegni

Il president communal Martin Cavegn fa in cordial beinvegni a tuttas Tuatschinas ed a tuts Tuatschins, als commembers dil cussegl da vischnaunca ed als commembers dalla cumissiun da gestiun tier l'emprena radunonza da vischnaunca dil trienni 2020/2023.

Il president communal constatescha che la radunonza ei vegnida convocada tenor las prescripziuns dalla costituziun communal, artechel 30, cun la publicaziun ellas Tuatschinas nr. 13 dils 26 da zercladur 2020 e nr. 14 dils 10 da fenadur 2020 sco era sin la pagina d'internet dalla vischnaunca. Ultra da quei seigi vegniu reparti in messadi en mintga casada.

Ils posts sco dumbravuschs sorprendan Otto Curschellas e Sabrina Flepp.

Las votaziuns vegnan per ordinari fatgas cun maunpli. Tier las votaziuns cun maunpli ei la pluralitad da quels che voteschan decisiva, ein las vuschs ulivas ei la damonda renviada. Ina quarta dils votants presents san pretender scrutini.

Martin Cavegn, president communal:

Il protocol vegn redeggiu da Simon Collenberg, scarvon e menader center communal. Niev ei che nus vegnin egl avegnir buca pli ad approbar ils protocols a caschun dalla radunonza da vischnaunca. Il protocol dallas radunonzas communalas vegnan sco tochen da cheu publicai ella Tuatschina (pertucca protocols naven dalla radunonza dils 26-06-2020), quei sil pli tard in meins suenter che la radunonza communal ha giu liug. Tuts han la pusseivladad d'inoltrar tier la suprastanza communal ina protesta encunter il protocol enteifer 30 dis suenter la publicaziun dil protocol. Quellas vegnan mintgamai tractadas a caschun dalla proxima radunonza communal. Silsuenter vegn il protocol approbaus. Vegnan neginas protestas inoltradas, ei il protocol approbaus e vegn buca tractandus a caschun dalla proxima radunonza communal. La nova lescha da vischnauncas dil cantun Grischun pretenda quellas adattaziuns.

Avon in'jamna haiel jeu astgau surprender il post sco president communal. Jeu engraziell agl anteriur president communal Beat Roeschlin cordialmein per la buna e transparenta surdada dallas differentas fatschentas politicas. Ad el sco era a sia entira famiglia giavischel jeu da tut cor tut mo il bien ed oravontut buna sanadad. El ha sincerau a mi ch'el vegni era egl avegnir a passentar bia temps ella Val Tujetsch e stetti per eventualas damondas da tut temps bugen a disposiziun. In grond engraziament ad el persuerter.

L'emprena seduta dalla nova suprastanza communal ha liug gliendisdis proxim. Jeu selegrel d'astgar luvrar ensemen constructivamein, transparent ed aviert cun mes consuprastonts. Bunamein tut ils posts vacants havein nus saviu occupar cun novas personas. Jeu engraziell a tuttas personas che stattan a disposiziun e semettan aschia en pil beinstar dil pievel tuatschin e quei en lur temps liber.

Proximamein seconstituescha la suprastanza communal e vegn a decider sur dallas representanzas els different posts da pliras instituziuns e societads, numnadamein tier:

- l'energia alpina;
- la Residenza Dulezi SA;

- la Fundaziun PUNTREIS;
- l'Andermatt-Sedrun Sport SA;
- Sedrun Mustér Turissem SA;
- la Regiun Surselva;
- la Sana Surselva e
- tier l'Axpo Hydro Surselva SA

Las persunas che representan la vischnaunca Tujetsch en quellas differentas societads ed instituziuns vegnan menziunadas pli tard ella Tuatschina.

Il pensum da lavur che spetga silla suprastanza communal, sil cussegl da vischnaunca e sil pievel tuatschin ei ordvart gronds, denton era interessants. Las pli impurtontas fatschentas ch'ei da liquidar ton pli spert:

- Las contractivas cun l'Andermatt-Sedrun Sport SA (ASS) pertuccont il bus local en connex cul project dil resort a Dieni;

La finanziaziun dil bus local ei ina gronda caussa. L'ASS spetga il consentiment dalla vischnaunca el rom dalla finanziaziun dil bus. Cheu vegnin nus ad anflar ina sligiazion adeguata.

- Las contractivas cun l'Andermatt-Sedrun Sport SA pertuccont differents puncts dil contract da servitut;

Nus vegnin a seser ensemen culs responsabels dall'ASS per discussiunar davart quels puncts.

- L'elavuraziun d'in concept da traffic che cumpeglia ils parcadis, la signalisaziun ed ulteriurs sclariments en connex cun la pendiculara Salins-Cuolm da Vi;

Era quella fatschenta basegna in dialog culs responsabels dallas pendicularas.

- La decisiun pertuccont la sanaziun cun ni senza l'engrondaziun dil Bogn Sedrun;

Pliras studias per quei project ein gia elavuradas. Uss duei il pievel decider, schebein el giavischa ina sanaziun cun ni senza engrondaziun dil bogn. La damonda principiala che setschenta en quei connex: Tgei ei la vischnaunca habla da financiar?

- L'engrondaziun dalla surfatscha dil Campadi Rein a Rueras;
- La sanaziun dalla Via dalla Staziun inclus la punt Tgamaura;

Las lavurs per la sanaziun dalla punt vegnan proximamein lantschadas.

- Il cass giuridic 4Peaks (anteriur hotel Alpsu);
- L'elavuraziun d'in concept per ina eventuala casa da giugs ella scola Rueras;

Nus stuein numnadamein nezegiar ils objects vits ch'ei avon maun (Tgésa s. Vigeli, Casa Soldanella) per novs intents.

- La transformaziun digitala dall'administraziun communal e dils ulteriurs menaschis comunals (Scola Sedrun, Uffeci forestal, serenera, Bogn Sedrun);

Quella transformaziun duei levgiar il mintgadi da lavur.

- La revisiun dalla constituziun communal, la quala vegn a pretender dil pievel tuatschin grond engaschi sco era vivas discussiuns.

Certs artechels dalla constituziun communal correspundan buca alla lescha cantunala da vischnauncas. La damonda principiala che setschenta en connex culla revisiun: Vulein nus mantener il cussegl da vischnaunca?

Naturalmein ei quei sulettamein ina pintga part da tuttas lavurs che spetgan sin nus. In'impurtonta lavur ei segiramein l'elaboraziun d'ina strategia surordinada 2020-2030 per la vischnaunca Tujetsch che dat avon certas directivas. Il maletg empalont ch'ei vegnius

elavuraus igl onn 2015, fuorma ina basa per la stipulaziun dalla strategia. La via co la vischnaunca da Tujetsch vegn ad elavurar la nova strategia, determinescha la suprastanza communal proximatein. La strategia duei cumpigliar las finamiras da nossa visiun. Sin fundament dalla visiun vegnin nus a decider davart las mesiras corrispudentas e silsuenter realisar quellas. Mo sin basa d'ina clara strategia eisi numnadamein pusseivel d'elaborar ils concepts necessaris e silsuenter realisar tals. El rom dall'elavuraziun dalla strategia vegn la suprastanza communal ad involvar il pievel tuatschin. Nus organisein ina occurrenza (october/november) per aschia possibilizar in dialog aviert e constructiv cullas personas. Nus stuein numnadamein definir, tgei che nus vulein egl avegnir respectivamein en tgei projects che nus vulein impunder ils daners.

Tuttas fatschentas politicas dattan dabia lavur da preparaziun per ch'ils gremis politics, en special il cussegl da vischnaunca e sco davos il pievel tuatschin sappien prender ina buna decisiun sutlunder. Igl ei da gronda impurtonza ch'il pievel seigi informaus e sappi decider sur dallas impurtontas fatschentas. Quei pretenda da nus tuts in grond engaschi ed in vast interest pils affars politics.

Nus mettein gronda peisa sin ina buna collaboraziun, oravontut spitgein nus da tuts buna e constructiva critica. In e scadin ei envidaus d'inoltrar bunas ideas che nus vegnin silsuenter ad examinar el detagl. Mo sche nus essan aviarts per tuttas ideas e mettein gronda peisa silla innovaziun, savein nus contonscher las finamiras. Lein luvrar ensemen per garantir ad in e scadin in bien avegnir.

2. Tractanda Residenza Dulezi – Finanziaziun dil secund plaun sutterrann ed adattaziun dil dretg da baghegiar

Presentaziun dalla tractanda entras Martin Cavegn, president communal:

A caschun dalla radunonza communal dils 23 da zercladur 2017 ei in credit ella summa da frs. 2'130'750.00 vegnius concedius per la construcziun dalla gascha, dil plaz avon la residenza, dils parcadis dalla vart vest dil baghetg ed ulteriuras lavurs dil contuorn. L'idea ei stada da lezzas uras che la gascha resta en possess dalla vischnaunca. L'administraziun dils parcadis publics havess giu da succeder entras la vischnaunca.

Igl access alla gascha sutterrana ei semidaus. Ultra da quei vegnan ils parcadis nezegiai oravontut dils habitonts dalla Residenza Dulezi. La gascha ha negin nez public. La Residenza Dulezi SA duei ord quei motiv finanzia g'entir secund plaun sutterrann (parcadis, tschalers e localitads per indrezs technics). Ils cuosts persuerter muntan a frs. 871'191.00. Ils cuosts pil contuorn survagan il credit d'impegn (svari lubiu: 10-15%) concediu. Ord quei motiv vegn la suprastanza communal a stuer procurar per in credit supplementar.

El connex cul niev access alla gascha sutterrana eisi necessari d'adattar il dretg da baghegiar. Il dretg vegn engrondius per 130 m² (entrada dalla gascha). La surfatscha totala munta uss a 806 m². Il dretg da baghegiar vegn concedius pils proxims 50 onns. Pils emprems 10 onns sto la Residenza Dulezi SA pagar negin tscheins pil dretg da baghegiar. Quei ei in grond levgiament finanzia per quell'interpresa. La societad acziunaria ha numnadamein da luvrar tenor principis economics. Ella ei obligada da contonscher in gudogn e saver far las amortisaziuns necessarias.

Sonda, ils 8 d'ost 2020 ha liug il di dallas portas aviartas ella Residenza Dulezi. Beat Roeschlin che presidescha il cussegl d'administraziun aunc entochen la fin d'ost vegn ad esser presents a caschun da quell'occurrenza. La residenza ei vegnida baghegiada sut sia bitgetta, aschia ch'el duei saver guder quei di.

Discussiun:

Otto Curschellas, vischin da Sedrun:

Jeu hai ina damonda concernent ils cuosts. El messadi per mauns da quella radunonza eisi menziunau ch'il surpassament dils cuosts schai ella rama lubida dils 10-15%, aschia ch'igl ei buca necessari da procurar per in credit supplementar. Daco eis Ti Martin allura dil meini ch'ei basegna in credit supplementar?

Martin, Cavegn, president communal:

Sco ei vesa ora pil mument, ein ils cuosts pli aults che prognosticau. Ord quei motiv vegnin nus ad esser sfurzai d'inoltrar ina damonda per in credit supplementar.

Votaziuns:

a) La radunonza communal va unanimamein d'accord che la Residenza Dulezi SA finanziescha il secund plaun sutterran (circa frs. 871'191.00) dalla Residenza Dulezi.

b) La radunonza communal approbescha unanimamein l'adattaziun dil dretg da baghegiar independent e cuzzont sco menziunau cheusut:

La surfatscha dil dretg da baghegiar independent e cuzzont che la vischnaunca conceda alla Residenza Dulezi SA silla parcella nr. 3136 munta niev a 806 m². Il dretg vegn concedius per in cuoz da 50 onns ed ei valeivels naven digl 1. d'avrel 2020. Pils emprems 10 onns sto la Residenza Dulezi SA pagar negin tscheins pil dretg da baghegiar.

3. Tractanda Orientaziuns

Martin Cavegn, president communal:

Concessiun d'aua per la Viafier federala

Dumengia, ils 12 da fenadur 2020 ha il pievel tuatschin da votar davart la concessiun d'aua per la Viafier federala (SBB). La concessiun generescha alla vischnaunca ina entrada annuala da rodund frs. 260'000.00. Il contract davart la concessiun ei gia suttascrets dalla Viafier federala.

Rheinquelle-Trail

Jeu engraziel als organisaturs ed als voluntaris dil Rheinquelle-Trail per lur grondiusa lavur.

Guido Monn, genau:

Sanaziun dalla Via dalla staziun

Proximamein entscheivan las lavurs da sanaziun vid la punt.

Martin Cavegn, president communal:

La procedura da perimeter vegn la suprastanza communal medemamein ad instradar proximamein.

4. Tractanda Varia

Pius Cavegn, vischin da Camischolas:

Jeu gratuleschel al niev elegiu president Martin ed alla nova suprastanza communal sin lur elecziun. Jeu giavischel a vus ina buna perioda d'uffeci. Bugen prendel jeu la caschun da far attents sin ina tematica, damai che critica constructiva ei giavischada tenor il plaid da Martin. Las lavurs da manteniment vid las vias da quartier ein vegnidas tralascadas ils davos 30 onns. Ei sa numnadamein buca esser ch'ei vegn mintgamai sanau l'entira via e repartiun ils cuosts el rom dalla procedura da perimeter enstagl da far las lavurs da manteniment ordinarias.

Avon 14 dis havein nus concediu il credit d'impegn per la sanaziun dalla Via dalla staziun. Quella via ha tenu 60 onns. Las vias da quartier ein mo 30 onns veglias. Ina via duess denton tener 60 onns. Tier quellas vias ein las lavurs da manteniment vegnidas negligidas. Ord quei motiv eisi necessari da sanar las vias.

Jeu supplicheschel vus da far annualmein las lavurs da manteniment necessarias per che las vias tegnien pli ditg. La contribuziun che la vischnaunca retscheiva annualmein dalla Viafier federala (concessiun d'aua) savess la vischnaunca impunder pil manteniment ordinari dallas vias.

Martin, Cavegn, president communal:

Quella supplica prendin nus bugen encunter.

Toni Cathomen, vischin da Rueras:

Ils davos onns ha la vischnaunca fatg grondas investiziuns ella loipa da cuorsa liunga. Nus havein fatg la homologaziun dalla loipa ed essan uss sin buna via da saver organisar igl onn 2021 campinadis svizzers. Ei vegn a haver liug duas etappas, ina miez schaner e l'autra la fin mars. L'organisaziun da quellas cuorsas surpren il comite d'organisaziun dil Surselva

Marathon. Nossa finamira ei numnadamein d'organisar occurrenzas da cuorsa liunga per aschia saver nezegiar la buna infrastruttura ch'ei avon maun.

Martin, Cavegn, president communal:

Jeu engraziel al comite d'organisaziun pil grond engaschi. La vischnaunca sustegn bugen vus, nua ch'ella sa. Las occurrenzas ein numnadamein da gronda impurtonza per nossa vischnaunca.

Toni Cathomen, vischin da Rueras:

Dapi 11 onns fetgel jeu part al comite d'organisaziun. Duront quels onns ha la vischnaunca adina susteniu quell'occurrenza. Jeu engraziel grondamein persunter.

Hans Jacomet, vischin da Sedrun:

Sut il vitg da Sedrun secatta la deponia da glera. Mintgamai cura ch'ei sufla, cuviera ina nebla da purla la vesta sur il vitg. Cura ch'ils autos da vitgira badunan la deponia, runan els miarda silla via che meina atras il vitg. Quella situaziun ei buca cuntenteivla. Jeu supplicheschel la suprastonza communal da far zatgei en caussa.

Martin Cavegn, president communal:

Nus prendin bugen encunter quella supplica.

Jeu engraziel a tuttas personas che han priu peda vegnir alla radunonza communal. Nus mein uss comunablamein a beiber in sitg ell'ustria Krüzli a Sedrun. A quellas personas che van a casa, giavischel in bien retuorn.

Sedrun, ils 10 da fenadur 2020

Actuar:
Simon Collenberg

President communal:
Martin Cavegn